

## **FUNKLOCK STOPPEN mit Platt, Politik un Perspektiven**

**Wenn en lütte Spraak as dat Soorbsche oder dat Plattdüütsche en echte Tokumst hebben schall, denn sünd dorför fastschreven Regeln nödig. Dat stunn fast an ´n Maandag, 21. Juni op den drüdden FUNKLOCK-STOPPEN-Onlineabend to dat Thema „Spraak un Gesett“. Bummelig dörting Deelnemers ut Sprekergrupp, Politik, Wetenschop un Medien harrn sik dortoschalt.**

En Gesett för Platt?

Referent weer Měto Nowak ut dat Brannenborgsche Kultusministerium in Potsdam. Dat Bunnsland Brannenburg hett siet 1994 en Sorbengesett un is jüst dorbi un arbeitd ok an en Nedderdüütschgesett, wat – so dat dörch den Landdag kümmt – Vorbild warrn kann för anner Platt-Bunnsländer. Wo groot de Inslag is, den Rechtsnormen för de Sprekers hebbt, wiesen de velen Bispelen, de Nowak ut dat Soorbsche bringen kunn.

De Utbu vun de Spraak

Een dorvun liggt op dat Feld vun de Sichtborkeit vun Spraak in den öffentlichen Ruum. Woneem tweesprakige Oorts- un Verkehrsschiller Plicht sünd, woneem tweesprakige Henwiesschiller an Gebäuden begäng sünd, dor mutt de Spraak flott maakt warrn, dat se düsse Opgaav beschicken kann. En Kommission mutt her, de rutfinnt, wat de beste soorbsche Utdruck is för Saken, för de dat betto noch keen giff, oder woneem en olen Utdruck, de harr passen kunnt, verschwunnen is un nu wedderhaalt warrn kann.

Dat Winnen vun niege Domänen

Dat geiht sodennig nich blots dorüm, dat en Soorbsch Woort op en Schild steiht, dat geiht ok dorüm, dat Strukturen opbuut warrt, de de Spraak wiederentwickelt un so mööglich maakt, dat de Spraak ok för Rebeten as Medien, Verwalten, Hoochschool dögg. De Spraakwetenschop snackt vun Spraakdomänen.

Dat Ansehn vun de Spraak

Dat Vörkamen in wisse Domänen kann dat Ansehn vun en Spraak, de vörher minnchtig bekeken worrn is, verbetern. Minschen lehrt en Spraak, de Ansehn hett, ehr se en Spraak lehrt, de se sülvst un de eensprakige Mehrheit keen Weert mehr bileggt. De soorbschen Oortsnaams in wisse Streken hebbt blangen de düütschen Naams offiziellen Status. Se kaamt sodennig ok in´t Navigatschoonssystem vör un stütt so dat soorbsche Gespreek vun Soorben in´t Auto, ehr se na´t Düütsche

wesselt, wiel ok de Maschien Düütsch snackt. De List vun de Effekten, de en lütt Gesett, wat tweesprakige Schiller vörschriift, hett, kann een noch lang widderschrieven.

### Strategisch dinken

Wichtig is, so Nowak, dat de Lobbyisten vun de Spraak sik kloor warrt, wat ehr Spraak bruukt, un dat se dat düütlich utspreekt. Helpen deit dat, wenn se weet, wokeen in Verwalten un Politik de Lüüd mit apen Ohren sünd för dat Thema. Goot is ok, wenn dat glücklich, junge Lüüd över düet Thema in Kontakt mit Politik to bringen. Referent Měto Nowak sülvst is en Bispeel. Ut den Spraakaktivismus is för em en Baantje worrn. In 't Potsdamer Kultusministerium arbeitet he vundaag as Referent vun den Lannsbeopdraagten för de Soorben.

### Keen Ünnerscheid twüschen Regionaal- un Minnerheitenspraak

Dat Inföddern vun Gesetten hett in den plattdüütschen Lobbyismus noch nich veel Ruum. As een vun de Grünen dorför nöömde de FUNKLOCK STOPPEN-Organisatoren den Ümstand, dat vele Plattdüütschen sülvst meent, dat en Regionalspraak weniger Rechten tosteiht as en Minnerheitenspraak. Obgliek he sülvst to en Minnerheit höört, seggt Měto Nowak kloor nee to so en Bild. Poor mal hett he in sien Vödrag ünnerstützt, wat de Organisatoren vun den Onlineabend dorüm to Anfang för FUNKLOCK STOPPEN offiziell verkloort hebbt:

„Wi wüllt, dat Minnerheitenspraken un Regionalspraken glik behandelt warrt. De Grund: All Spraken bemööt de sülvigen Swoornissen – de Sprekers warrt weniger, de Spraak an sik verfallt -, un wi wüllt all de Spraken den glieken Weert tospreken. Wi appelleert sünnlicher an de Sprekers vun dat Nedderdüütsche, dat se de egen Spraak achten doot.“ (FUNKLOCK STOPPEN, 21.06.2022)

### Langen Weg

De eenunhalv Stünnen to „Spraak un Gesett“ hebbt Masse Themen ansneden, de elkeen för sik en egen Wekenenn-Warksteed utfüllen kunnen, wat een vun de Deelnemers sä. Referent Měto Nowaks wichtigsten Tip för de plattdüütschen Aktivisten keem toletzt: En langen Aten hebben un nich den Moot verleren.

### Achtergrund:

FUNKLOCK STOPPEN sett sik dorför in, dat na Vörbild vun anner lütte Spraken in Europa ok de plattdüütsche Sprekergrupp mit en öffentlich-rechtlich Medienanbott versorgt warrt, wat elkeen Dag sennen deit un mit de sülvige Qualität as in hochdüütsche Programmen op Platt över Welt un Region berichten deit, darto dat Wedder anseggt un Kortwiel anbütt. Dragen warrt de Kampagne vun Bundesraat för Nedderdüütsch/Nedderdüütschsekretariat un Sleswig-Holsteenschen Heimatbund mit Ünnerstütten vun mehr as 30 Institutschonen in all acht plattrelevanten Bunnsländer. Mehr Info: [www.funklockstoppen.de](http://www.funklockstoppen.de)

Kontakt: [j.graf@heimatbund.de](mailto:j.graf@heimatbund.de); [info@niederdeutschsekretariat.de](mailto:info@niederdeutschsekretariat.de)